

Verbâl de Assemblee Gjenerâl Ordenarie dai 11 di Març dal 2018

Clamade adun cun letare dai 15 di Zenâr dal 2018, prot. nr. 6/18, daûr dal art. 8 come 2 dal Statût,

- in prime convocazion, sabide ai 10 di Març dal 2018, aes 11 sot sere;
- in seconde convocazion, domenie ai 11 di Març dal 2018, a lis 10 di buinore;

si è tignude a Udin, tal Salon d'Onôr "Guglielmo Pelizzo" di Palaç Mantica, in vie Manin 18, la Assemblee Gjenerâl Ordenarie de Societât Filologjiche Furlane, par discuti di chest ordin dal di:

1. Esam, discussion e aprovazion dai documents di Belanç 2017;
2. Esam, discussion e aprovazion dai documents di Belanç di prevision 2018;
3. Variis.

Al cjape la presidence de Assemblee il President de Societât Filologjiche Furlane, Federico Vicario.

Daûr dal art. 8, come 3 dal statût, stant che a la prime convocazion no si è presentât nissun, il President al declare costituide cun regolaritât in seconde convocazion la Assemblee Gjenerâl dai socis de Societât Filologjiche Furlane "Graziadio Isaia Ascoli". Il President al propon Feliciano Medeot, Diretôr de Societât, tant che segretari verbalizant de Assemblee; la Assemblee e fâs buine la propueste.

Il President al domande a ducj i presints di rispietâ un moment di corot par ducj i socis che a son vignûts a mancjâ vie pal 2017 e tai prin mêis dal 2018.

Si passe duncje al exam dal ordin dal di.

Pont n. 1 dal ordin dal di:

Esam, discussion e aprovazion dai documents di Belanç 2017.

Il President al tache i lavôrs cu la leture de relazion morâl e, daspò, de relazion su lis ativitâts davueltis tal 2017. A conclusion, il President al passe la peraule al Tesorîr de Societât, Carlo del Torre, che al presente il rindicont di gjestion 2017 e il Stât Patrimoniâl ai 31.12.2017 de Societât, che al evidenzie un risultât economic de gjestion dal esercizi positîf par un impuart di 591,74 euro e al propon di puartâ chest impuart a risiervis.

Al interven po il President dal Coleç dai Revisôrs dai Conts, Lorenzo Ronzani, che al lei la relazion che e esprim il parê positîf a la aprovazion dal Belanç 2017 di bande de Assemblee dai socis e a la propueste fate dai amministrazôrs par meti a risierve il risultât di gjestion.

Ae fin de relazion e dai interventi, si passe a la votazion sul Belanç 2017 che al è fat bon a la unanimitât; e je fate buine ancje la propueste dai amministrazôrs di destinâ il risultât positîf di gjestion 2017 a risierve, simpri a la unanimitât.

Pont n. 2 dal ordin dal di:

Esam, discussion e aprovazion dai documents di Belanç di prevision 2018.

Il President al presente a la Assemblee lis liniis di ativitât de Societât pal 2018 e al presente ancje il prospet dal Belanç preventîf pal 2018.

Si passe duncje a la votazion dal Belanç di prevision 2018 e dal Belanç trienâl 2018-2020, che a vegnin fats bogns a la unanimitât.

Pont n. 3 dal ordin dal di:

Variis.

Il President, daspò des relazions, al passe la peraule pal salût al Assessôr ae culture dal Comun di Udin, Federico Pirone, che al ricuarde la atenzion dal Comun di Udin aes ativitâts de Filologjiche. Al ringrazie il President pal riferiment te sô relazion ae presince dal furlan in RAI e al ricuarde la colaborazion jenfri la Filologjiche e il Sisteme bibliotecari di Udin, cumò Sistema Bibliotecario del Friuli. Al conferme che Udin e ospitarà il Congrès dal Centenari de Filologjiche e al siere cuntune riflession: intune Europe indulà che i nazionalisims a tornin fûr, a metin in dificolât lis autonomiis.

L'Assessôr regionâl ae culture Gianni Torrenti al ricuarde la atenzion de Region ae Filologjiche, e in gjenerâl aes politichis lenghistichis, tai bants culture e tes bibliotechis. Al ricuarde ancje l'impegn de Region pai bens Culturâi, tal cjapâ in carche funzions come tal câs di Aquilee, indulà che la Region e à cjapât lis competencis sui Museus; par ce ch'al inten la competence su la Istruzion, il problem al è la cuvierture dai coscj pe gjestion de scuele; i finanziaments ae Leç 482 a son dopleâts par impegn de Region Friûl Vignesie Julie e Sardegne; pe convenzion cu la RAI al è l'acuardi cu la Presidence dal Consei dai Ministris par vê 90 oris di television in RAI.

Seont l'Assessôr Torrenti, la Universitât dal Friûl e à di fâ di plui pe lenghe furlane, parcè che al sta tal pat fondatîf dal Ateneu dal Friul. Al siere cuntun riferiment aes Unions teritoriâls intercomunâls, ametint che si à di ripensâ il guvier dal teritori.

Il senadôr Mario Pittoni al ricuarde il so impegn tal cjamp de istruzion, dai finanziaments ae Universitât dal Friûl e de RAI.

A intervegnin i socis:

- Aldevis Tibaldi al segnale che a Palaç Mantica al mancje l'acès pai pidimentâts e al lamente une incapacitât di fonde pe difese de furlanetât di bande de comunitât furlane, come tal câs dal Museu Etnografic dal Friûl, indulà che a mancjin indicazioni par furlan; dal intolerabil comportament de Universitât dal Friûl che no si interesse di lenghe furlane; de RAI che no à dome di vê transmissions par furlan ma e à di jessi furlane; dal Messâl furlan che nol è inmò stât fat bon de Glesie; de abolizion des Provinciis e des UTI che a van a disdrumâ il Friûl. Al siere rimarcjant la necessitât di vê plui cussience pal Friûl.
- Renzo Ciutto al lamente che si è daûr a pierdi l'identitât in Friûl, a pierdi la lenghe in ducj i sens.

- Angelo Bertoia al domande informazions su lis ativitâts 2018: va ben la digjitalizazion dai materiâi dai archivis e de biblioteche, ma si à di vê atenzion ancje ai socis che no doprin lis gnovis tecnologjiis. Al domande che tal Strolc e sedi plui presince di poesiis.

A ducj ju intervenis al rispuint il President Vicario.

Stant che nol è altri ce discuti, la Assemblee si siere a lis 12.45.

Udin, al 11 di Març dal 2018

Il segretari verbalizant
Feliciano Medeot